

Utambuzi, Hisia na Mabadiliko ya Kisemantiki ya Leksia za Kiswahili

*Tirus Mutwiri Gichuru
Chuo Kikuu cha Kenyatta*

Ikisiri

Makala haya yamejadili nafasi ya utambuzi na hisia katika mabadiliko ya kisemantiki ya leksia za Kiswahili. Makala yanaonyesha namna maarifa katika utambuzi hujenga msingi na kuongoza mbinu na taratibu mbalimbali za mabadiliko ya kisemantiki na hatimaye kuchangia katika mabadiliko ya maana. Mifano mahususi ya leksia kutoka Kiswahili cha kabla ya Karne ya Ishirini na cha Karne ya Ishirini na Moja imelinganishwa kudhihirisha mabadiliko husika. Asili ya data ni matini teule za kabla ya Karne ya Ishirini, matini za kilekskografija za Karne ya Ishirini na Moja na kutoka kwa wazungumzaji wa pwani ya Kenya wenye elimu-asilia. Nadharia ya Semantiki Tambuzi imezingatiwa. Imebainisha kuwa tajriba na maarifa yaliyofichamwa kwenye utambuzi huwa nguzo muhimu katika kuleta mabadiliko ya maana za leksia. Imegunduliwa kuwa kila kuchao utambuzi huzidi kupanuka kiupeo, kufinyika na kugeuka pindi jamii nzima inavyobadilika kutokana na maendeleo ya sayansi, teknolojia, uchumi, jamii na siasa. Kadhalika fasili tofauti za dhana moja, usisitizo na kuipa dhana kipaumbele ni maswala ya kiutambuzi yachangiyo kuleta mabadiliko ya lugha. Makala haya pia yamedhihirisha mchango na ufaafu wa vigezo vya kiutambuzi vya nadharia ya Semantiki Tambuzi katika kuelezea mabadiliko ya lugha.

Maneno Muhimu: Utambuzi, Hisia, Mabadiliko, Leksia, Semantiki Tambuzi, Taswira, Sitiari, Maarifa

Utangulizi

Wanasaiakolojia tambuzi hueleza kuwa mwanadamu hutumia mfumo wa kiutambuzi katika kuufasiri na kuudhibiti ulimwengu wake halisi na wa kidhahania (Lakoff na Mark, 1980; Croft na Cruse 2004). Kwao utambuzi wa lugha ni sehemu ya mfumo wa utambuzi wa binadamu kwa ujumla na haishughulikiwi na sehemu ya kipekee au mahususi kando na tambuzi za masuala mengineyo kama ya kisaikolojia na hisia (Croft na Cruse, 2004; Vyvyan na Greeens, 2006; Lemmens 2017). Kadhalika, nyenzo kuu za kujipatia maarifa ni kupitia hisia tano za mwanadamu: kuona, kusikia, kugusa, kuonja na kunusa. Kwa mfano, mtoto anaanza kuelewa dhana ya ‘ndani na nje’ kupitia tajriba yake ya kuweka vitu ‘ndani ya’ mdomo wake. Maarifa haya huhifadhiwa katika ‘ghala la maarifa’ ambalo hujenga mfumo wa kiutambuzi.

Maarifa ambayo tayari yamo kwenye tambuzi za wanajamii huwasaidia kukabili dhana mpya na mageuko anuwai katika mfumo wa jamii. Mathalani, magari ya kivita ya kijeshi (vifaru) yalipoanza kutumika kwa mara ya kwanza katika vita vya kwanza vya dunia kati ya mwaka wa 1914 hadi 1918, Waswahili waliyaita magari haya ‘vifaru’ maadamu yalishabihiana kiumbo na mnyama aliyejulikana wazi katika mazingira yao. Ni wazi kuwa upanuzi wa upeo wa maana ulichochewa na kukiwtwa katika taswira ya mwono.

Fauka ya haya, dhana inapokosa matumizi hutiwa katika kaburi la sahau au kutumiwa kuwakilisha dhana nyingine tofauti. Kwa mfano, *gungu* ilikuwa sinia kubwa ya kizamani ya Waswahili iliyotengenezwa kwa shaba nyeupe yenyе asili ya Kishirazi au Uajemi (Abdulaziz, 1979). Kabla ya karne ya 20, Waswahili waliipiga sinia hii kama ala katika nyimbo za harusi. Baadaye leksia *gungu* ilihamia kutoka *kifaa* hadi *ngoma yenye*. Maana mpya pekee ndiyo iliyo katika tambuzi za Waswahili wa kisasa. Katika TUKI (2013) ‘*gungu*’ inaelezwa kama ‘*ngoma mojawapo* ya kizamani ya watu wa mwambao wa Afrika Mashariki.’ Katika Unguja kulikuwa na *gungu la kufunda* iliychezwa na mke na mume na *gungu la kukwaa* iliychezwa na familia mbili ya mke na mume (Steere, 1870). Kuna mabadiliko ya aina mbili katika lugha: mabadiliko potevu na mabadiliko ingizi. Mabadiliko potevu ni mabadiliko ambayo neno hypotea kabisa au neno jipya huibuka na kutumika badala ya lile la zamani. Mabadiliko ingizi huwa mabadiliko ambapo msamiati huongezeka kwenye msamiati wa zamani. Msamiati mpya huingizwa katika lugha kwa njia ya kuunda maneno mapya au kutohoa kutoka lugha nyingine. Mabadiliko ya Kileksia katika lugha ya Kiswahili yanahusisha mikondo mitatu mikuu kulingana na namna tatu za utokeaji:

- (i) Uingizaji wa maneno mapya kwa sababu hakuna maneno yanayowakilisha dhana husika. Kwa mfano, *kitanzambali* (kifaa kidogo cha kielektroni cha kuteua na kuthibiti mitambo kutoka mbali; rimoti).
 - (ii) Uingizaji wa maneno mapya yatumike sambamba na yale ambayo yapo. Kwa mfano, leksia *kompyuta*, *ngamizi* na *tarakilishi* hutumika sambamba.
 - (iii) Kupotea kwa maneno ya awali. Kuna baadhi ya leksia ambazo zilikuwa zikitumika zamani lakini kwa sasa leksia hizo hazitumiki tena huku nafasi yake ikichukuliwa na leksia mpya. Hii hapa ni mifano kutokana na Nabhani (2012):
- | (1) | <u>Kikale</u> | <u>Kisasa</u> |
|-----|---------------|---------------|
| | Gongwa | Ikulu |
| | Ng’andu | Dhahabu |
| | Ngeu | Damu |
| | Utongolezi | Fitina |
| | Tinene | Bara |

Leksia nyingine katika (1) zilipotea katika matumizi na hupatikana tu katika tungo za kale. Msomaji yejote wa matini za kabla ya Karne ya Ishirini anakumbana na leksia za Kiswahili za kale. Wakati huohuo anakumbana na leksia mpya zinazobuniwa kila kuchao kutokana na maendeleo na mabadiliko katika muundo wa jamii.

Suala la kubadilika kwa maana za leksia huchunguzwa katika tawi la isimu la Isimu Historia. Isimu historia hutalii mabadiliko mbalimbali ya lugha kadri miaka inavyopita. Mabadiliko ya lugha bila shaka huambatana na maendeleo na mabadiliko ya kijamii, kisiasa, kiuchumi kiteknolojia. Lugha ya Kiswahili sawa na lugha nyingine haijasazwa na mabadiliko ya lugha katika viwango mbalimbali. Maumbo ya lugha yanapobadilika au kupotea hufanya maandishi yaliyopo kutoeleweka kwa urahisi hasa kwa wanaojifunza lugha kwa mara ya kwanza. Hali hii ndiyo inamkabili msomaji yejote wa matini za kabla ya Karne ya Ishirini. Matini hizi zinaonekana kutumia maneno magumu na baadhi yake yamepotea katika tambuzi za watumizi wa Kiswahili katika Karne ya Ishirini na Moja. Mathalani, Kiswahili kilichotumiwa katika *Kasida za Hamziyya*, *Al Inkishafî*, *Diwani ya Muyaka bin Haji* na *Utendi wa Fumo Liyongo* ni tofauti na lugha katika matini za karne ya Ishirini na moja. Kadhalika, kazi tangulizi za kilekskografie kama vile Steere (1870, 1919) na Krapf (1882) zinasheheni leksia ambazo katika kisasa zina maana iliyobadilika. Kubadilika kwa maana leksia ni suala zito la kiisimu ambalo huathari muundo wa lugha.

Japo kuna wataalamu na wahakiki walioshughulikia matini za kale za Kiswahili kama vile Hichens (1939), Harris (1962), Knappert (1979), Allen (1971), Abdulaziz (1979), Timammy na Swaleh (2013) mionganoni mwa wengine, walijikita kwenye fani mbalimbali za kifasihi zilizotumiwa katika tungo hizi. Kazi nyingi zilipendelea uchambuzi wa fani na maudhui bila kushughulikia kwa kina suala la mabadiliko ya maana katika mpito wa wakati. Ni hali hii ambayo imezua haja ya uchunguzi uliojikita katika mabadiliko ya maana za leksia mahususi za Kiswahili zilizopitia mabadiliko, kwa kufaidi vigezo mbalimbali vya kiutambuzi.

Mbinu za Utafiti

Data iliyochanganuliwa ilikusanywa kutoka kwa matini za kale za Kiswahili na nyingine kukusanywa kutoka kwa wahojiwa walio na ujuzi wa Kiswahili cha kale. Matini zifuatazo ziliteuliwa: Krapf (1882) *Dictionary of Suaheli Language*; Steere (1870). *A Handbook of the Swahili Language as Spoken at Zanzibar. Revised Edition by Madan* (1919); Burt (1910) *Swahili Grammar and Vocabulary*; Hichens (1939). *Al-Inkishafî: The Soul's awakening*; Allen (1971). *Tendi: Six examples of a Swahili Classical Verse form with Translations and Notes*; Abdulaziz (1979). *Muyaka 19th Century Swahili Popular Poetry*; Mutiso wa Kineene (2005). *Utenzi wa Hamziya*; Mulokozi (1999). *Tenzi Tatu za Kale*; Chiraghdin (1987). *Malenga wa Karne Moja na Nabhani* (2012) *Kandi ya Kiswahili*.

Kati ya leksia mia tano zilizokusanywa, sampuli ya leksia mia mbili iliainishwa na kupangwa katika makumbo ishirini na matatu kwa misingi ya uhusiano wa kimaana kama vile leksia za wanyama, leksia za vifaa, leksia za biashara na kadhalika. Leksia za Kiswahili cha kale kilichofifia na zingine ambazo zingali zinatumika katika Kiswahili cha kisasa kama vile *umeme*, *kanga* na *ndege*. Hata hivyo katika makala haya, ambayo ni sehemu tu ya utafiti uliokuwa mpana zaidi, tumeteua sampuli na kuchanganua misfano michache ambayo inaoana na malengo ya makala haya. Ili kuboresha uwasilivu, itakuwa muhimu tueleze kwa kifupi misingi ya nadharia iliyotuongoza katika utafiti huu.

Nadharia ya Semantiki Tambuzi

Nadharia ya Semantiki Tambuzi ni sehemu ya nadharia pana ya Isimu Tambuzi yenye asili yake katika Saikolojia Tambuzi (Vyvyan et al 2006). Mtazamo huu uliibuka katika miaka ya 1970 kwa sababu ya kutoridhika na mitazamo iliyotawala kipindi hicho na iliyotumia mfumo wa kanuni kufafanua lugha. Isimu Tambuzi ni mtazamo unaochunguza uhusiano kati ya maumbo ya lugha, akili na maumbo yanayopatikana katika mazingira na jamii (Vyvyan, keshatajwa; Lemmens 2017). Mtazamo huu huchunguza lugha kama chombo kinachorudufu fikira na kuakisi mfumo wa dhana na ruwaza ya fikira. Hutazama lugha kama mfanyiko wa kiakili sawa na hisia zingine za mwanadamu (Lee, 2001). Semantiki Tambuzi hushughulikia uhusiano kati ya tajriba, mfumo wa dhana na muundo wa maana wa lugha. Kulingana na Lakoff (1987), Taylor (1999), Lee (ibid), Croft na Cruse (2004), Vyvyan et al (keshatajwa) na Lemmens (keshatajwa), mtazamo huu una misingi ifuatayo:

(i) *Lugha kuwa sehemu ya utambuzi kwa ujumla*

Kama tulivyotangulia kudokeza, utambuzi wa lugha ni sehemu ya mfumo wa utambuzi wa binadamu kwa ujumla (Croft na Cruse, 2004). Lugha haishughulikiwi na sehemu ya kipekee au mahususi kando na tambuzi za masuala mengineyo kama ya kisaikolojia na kihisia. Hakuna kifaa mahususi cha kiakili kinachoshughulikia lugha; msimamo unaokinzana na madai ya wanasarufi-zalishi.

(ii) *Kiini cha lugha huwa ni kuwasilisha maana*

Semantiki Tambuzi hutambua kuwa kiini cha lugha ni kuwasilisha maana (Talmy, 2000). Maumbo yote ya lugha yamefumwa pamoja katika utambuzi kwa kusudi la kuwasilisha maana. Basi maana huwa katika majopo ya kiutambuzi. Maana haziwezi kuelezeka bila kurejelea utambuzi kwa ujumla. Kwa hivyo maana si miliki tu ya leksia lakini mawanda yote ya utambuzi yana mchango katika kudhihirisha maana. Kimsingi, sarufi na leksia si hazina tofauti bali ni ncha mbili za upanga mmoja kama mchakato wa kudhihirisha maana. Vipengele vingine kama sifa za kiarudhi pamoja na sitiari pia huchangia katika kufuma maana.

(iii) *Maana imejikita katika maumbile ya binadamu yakiwa msingi wa kufasiri dhana katika ulimwengu wake.*

Maana inaumbika katika tajriba za pamoja za watu zinazohusiana na umbile la binadamu. Maumbile na umbo lake binadamu humjengea binadamu misingi ya kutambua dhana mbalimbali katika mazingira yake, kile wanaisimu tambuzi huita picha au taswira (Vyvyan et al 2006; Lemmens 2017). Basi kifaa cha tingatinga cha kuchimbia na kupakia vitu watakiita *mkono wa tingatinga*. Wanadamu husimbua maana kutokana na namna wanavyofasiri dhana fulani. Kwa mfano, unapowauliza watu kadhaa walichokiona walipotembelea jijini Nairobi watatoa majibu anuwai kama vile waliona magari mengi, majumba marefu, bidhaa rahisi, barabara za kisasa, maduka mengi ya jumla, wachuuzi wengi kutegemea tajriba, usisitizo na madhumuni yao ya kutembelea jiji. Mhimili huu husaidia kueleza tofauti mbalimbali zinazochipuka kutoka na ufasiri wetu wa dhana moja. Pia unasaidia kueleza nafasi ya sitiari na lugha ya kimafumbo katika kuleta mabadiliko ya lugha.

(iv) *Maarifa ya kiutambuzi huwa katika kategoria zenye mizunguko na uzito (wa maana) ukififia kutoka kiinimaana.*

Maarifa aliyonayo mtu huwa yamehifadhiwa katika kategoria mbalimbali (Lee, 2001; Langacker, 2016). Vyvyan na Greens (2006) wanaelezea kuwa leksia ni chombo kinachotumiwa na wazungumzaji katika kufikia maarifa yaliyopo katika hifadhi ya maarifa katika utambuzi. Kwa mfano neno ‘paka’ linapotamkwa linachochea mhusika kufikia maana ya msingi ya paka pamoja na masuala mengineyo yanayozunguka dhana hii kama vile familia mbalimbali za paka, sauti na chakula wakipendacho. Aidha neno ‘mama’ lina maana msingi yaani ‘aliyezaa kiumbe fulani.’ Hata hivyo maana hii msingi imeambatanishwa na maana zingine za neno mama kama vile mama wa kambo, mama mlezi, mama mkwe na kadhalika. Maarifa haya kwa ujumla hujenga mizunguko ya kategoria kuhusu maana ya neno ‘mama’. Uzito wa maana hufifia ukiondoka nje ya kiini maana au maana msingi (Lakoff, 1997; Croft na Cruse, 2004). Dhana hii ilisaidia kueleza namna maana msingi huweza kupishana nafasi na maana za ziada. Pia inatusaidia kueleza kufifia kwa maana na nafasi ya metonimu katika mabadiliko ya maana leksia. Mizunguko ya maana inakuwa muhimu katika kueleza uhusiano wa kipolisemia wa maana.

(v) *Lugha hahuisha ujenzi wa picha za mawazo na mipaka ya kidhana katika mawanda ya kiutambuzi.*

Utambuzi na matumizi ya lugha hahuisha kujenga mipaka ya kidhana (Lemmens, 2017). Binadamu ana uwezo wa kuhamisha dhana mbalimbali kidhahania kupitia sitiari, jazanda, metonimu na uhulutishaji (Croft, 1993). Kulingana na wanaisimutambuzi, sitiari ni mchakato wa kuhamisha dhana kutoka kwa wanda moja na kuipachika kwa dhana tofauti ya wanda jingine (Lakoff na Mark, 1980). Kuhusu uhulutishaji, mawanda mawili yanatoa dhana inayounda dhana tofauti katika wanda jingine. Mhimili huu unasaidia kueleza mabadiliko ya maana leksia yanayoletwa na matumizi ya jazanda au sitiari, lugha ya kimafumbo, tasfida, metonimu na uhulutishaji. Huu ndio msingi wa mabadiliko ya maana leksia.

(vi) *Maana hujikita katika kaida na tajriba za pamoja; ina sifa za kitamaduni*

Isimu tambuzi hutambua maana iliyojikita kwenye tajriba (Vyvyan na Greens, 2004). Maana ya maumbo ya lugha huibuka katika jamii na utamaduni wa watumiaji wa lugha (Päivi na Maria, 2016). Kwa hivyo wanaisimu tambuzi huzingatia mtazamo-tumizi katika uchanganuzi wa lugha. Mtazamo huu hushikilia kuwa kuna kufanana kwa kiasi kwa namna watu hutumia lugha. Wao huiga na kuathiriana kilugha. Mhimili huu unasaidia kufafanua mabadiliko yanayoletwa na lugha ya mafumbo na tasfida, athari za lugha za kigeni na suala la kuiga mitindo mbalimbali ya lugha ambayo pia huleta mabadiliko ya maana leksia.

(vii) *Maana huwa na muundo wa kiensaiklopidia*

Maana hujumuisha maana msingi pamoja na fahiwa zake zote (Geeraerts Mha., 2006; Lemmens, 2017). Japo kuna maana moja kuu ya kileksia, anayejua maana ya leksia fulani pia hujua maelezo mengineyo mengi yanayoambatanishwa na leksia hiyo. Vilevile hakuna mipaka mahususi na bayana kati ya maana leksia na utambuzi unaotokana na maana hiyo. Kwa hivyo maana ya leksia fulani ni maana kuu pamoja na maelezo ya matumizi yake katika miktadha anuwai ya jamii. Hii ndiyo maana ya kiensaiklopidia. Maana ya leksia fulani haiwezi kueleweka kikamilifu bila kuhusisha maarifa ya kiensaiklopidia ya leksia hiyo. Kwa hivyo aliye na umilisi wa dhana ‘simba’ pia hutambua sifa zake kama vile ujasiri wake, angurumavyo, sura yake, chakula akipendacho na familia yake. Lee (2001) anaeleza kuwa kubadilika kwa upeo wa maarifa, usisitizo, kuipa dhana mahususi kipaumbele na sitiari huchangia pakubwa kuleta mabadiliko ya lugha. Katika kauli *Yeye (A) ni simba (B)*, sifa ya *ujasiri* ndiyo imepewa kipaumbele licha ya mnyama husika kuwa na sifa nyinginezo. Pia mmilisi wa lugha atatambua kuwa anayerejelewa (A) ni binadamu na si mnyama. Mhimili huu unasaidia kueleza mahusiano ya maana asili na maana mpya zinazoambatanishwa na dhana fulani; kihalisia au kitamathali.

Uchanganuzi na Matokeo

Uchanganuzi ulihuisha kutambua leksia zilizobadilika kimaana na kubainisha mbinu za mabadiliko ya kisemantiki zilizohusika. Uchanganuzi ulibainisha bayana kuwa mabadiliko ya maana za leksia si suala la kiholela bali yaliambatana na mifanyiko mbalimbali ya kiutambuzi. Wanasemantiki tambuzi hueleza kuwa binadamu ana uwezo wa kuhamisha dhana toka kitu au dhana moja hadi kitu au dhana nyingine katika mawanda ya kiutambuzi. Maarifa ambayo tayari yako katika tambuzi zao hujenga msingi wa kuelezea dhana mpya kwa kutumia uwezo wao wa kuunda picha au taswira; kile Lakoff (1987) anakiita sitiari. Kinachohamishwa huwa tabia, taswira ya umbo au kazi ya kitu kwa kuihusisha na tabia au umbo au kazi ya kitu kingine. Kipacha (2005) alisema kuwa sitiari ina muundo ufuatao: mada (kizungumzwa), taswira (kifananishi) na ufanano (kiungo). Zingatia jedwali lifuatalo:

Jedwali 1: Muundo wa Sitiari: Mada, Taswira na Ufanano


Mada (Kizungumziwa)	Taswira (Kifananishi)	Ufanano (Kiungo)
Stima	Umeme	Mwangaza
Kiingilio	Mdomo	Uwazi, upenyo
Uongozi	Simba	Ujasiri
Mke	Jiko	Upishi
Riziki	Unga	Hulisha mtu
Bidii	Jasho	Huzalisha riziki

Katika mifano hii, lugha ya kitaswira ilihusika kuleta mabadiliko yanayotokana na ufanano wa aina fulani. Ni wazi kuwa maarifa aliyonayo mtu, humjengea msingi wa kufasiri ulimwengu wake halisi au wa kidhahania.

Uchanganuzi ulibainisha kuwa maumbile ya mwanadamu humjengea msingi wa kuufasiri ulimwengu wake. Zingatia mifano ifuatayo:

(1) <i>Sehemu ya mwili</i>	<i>Maana ya Kimsingi</i>	<i>Maana mpya</i>
Kichwa	Kiungo juu ya shingo	Kiongozi, kinara
Mdomo	Uwazi wa kulia/kinywa	Uwazi katika kifaa ~ wa chupa
Jicho	Kiungo kionacho/maninga	Pambo kwenye omo/ gubeti ya jahazi
Moyo	Mtima	Kiini cha mti
Ulimi	kiungo ndani ya kinywa	Lugha

Maanamsingi na maana ya awali ya *tumbo* ni ‘sehemu inayofanana na **mfuko** iliyo **ndani** ya viumbe ambayo inapokea na kukisaga chakula’. Baadaye leksia hii ilibadilika ikapata maana ya jumla na kuwa: ‘sehemu (yote) ya kiwiliwili iliyo kati ya kifua na kinena.’ Kwa ufupi, leksia msingi imepanuka na kuhusisha dhana za kandokando kama inavyodhihirishwa katika kielelezo kifuatacho:




Kielelezo 1: Mageuko ya ‘tumbo’ kutoka Kiini- Maana

Maana imekuwa ya jumla. Basi mbinu ya mabadiliko ya kisemantiki iliyohusika ni *semantiki panuzi na sitiari*.

Uchanganuzi pia ulibainisha kuwa hisia tano za mwanadamu za kuona, kusikia, kuonya, kugusa na kunusa zina nafasi muhimu katika mabadiliko ya maana za leksia za Kiswahili. Hisia hizi husaidia kujenga taswira katika hali halisi au kidhahania. Hii hapa ni mifano inayohusiana na taswira ya mwono:


(i) Mabadiliko kupitia taswira ya mwono

Binadamu anapoona kitu kinachoshabihiana na kingine anachokijua, huwa mwelesi wa kutambua uhusiano kati ya dhana zote mbili kianalojia kupitia picha au taswira. Aidha, binadamu ana uwezo wa kiatumbuzi wa kuhamisha dhana kutoka wanda moja la maarifa hadi jingine (Lakoff na Mark, 1980). Hali hii husababisha upanuzi wa upeo wa maana ya leksia zinazohusika. Basi maana mpya ya leksia inahusiana na ya awali kihistoria kupitia *uhusiano wa kisitiari*. Ikumbukwe kuwa dhana zinazohusishwa kimwono zinaweza kuwa za kiumbo, maumbile, matumizi, hulka, kiwango, mahali au mwendo mradi zinaonekana. Hii hapa ni mifano ya leksia zilizobadilika kupitia taswira ya mwono licha ya kuwa katika mawanda tofauti. Tazama picha kwa makini:




Picha 1: Pembe za Mnyama na Maumbo yake Nyambulishi

Dhana asilia iliyokuwa katika tambuzi za Waswahili ni pembe za wanyama ambazo huwa na ncha kali. Taswira ya mwono ndiyo imezingatiwa kuyapa majina maumbo yaliyoambatanisha, hali iliyopanua maana ya leksia pembe. Tazama picha nyingine:




Picha 2: Kanga (ndege) na Kanga (leso)

Maana asilia ya *kanga* ni ‘aina ya nyuni wa jamii ya kuku anayeishi porini, mwenye rangi ya kijivu iliyokoza na madoadoa.’ Leksia hii pia hupatikana katika lugha zingine za Kibantu; *nkanga* (Kinzuani, Kipokomo, Kimeru, Kikuyu); *nkaanga* (Ki-Mwiini); *k^hanga* (Kiduruma, Kiamu, Kimvita); *nkanga-dungwe* (Ngazija); *anga* (Kimwani). Leksia hii ingali inatumika katika Kiswahili Sanifu kwa maana hiihii (TUKI 2013). Leksia ‘kanga’ ilipanuka kimaana kutajia *vazi maalum* yaani ‘aina ya nguo nyepesi yenye nakshi na maandishi inayovaliwa na wanawake, leso’ (Abdulaziz, 1979; National Museums of Kenya, 2005). Pia tazama picha ifuatayo:



Picha 3: Vifaru

Maana ya leksia *kifaru* ilibadilika katika karne ya ishirini kuwakilisha gari la chuma la kivita lenye mzinga katika sehemu yake ya mbele. Gari lenyewe hutumiwa na wanajeshi kutupia makombora. Vifaru vilitumiwa kwa mara ya kwanza na Ufalme wa Muungano wakati wa vita vya kwanza vya dunia (1914-1918) dhidi ya Wajerumani. Huenda mabadiliko haya yalitokea wakati huo. Taswira ya kuona iliyojengeka Waswahili walipoona kifaru (gari) kwa mara, ilisimbua maarifa ambayo tayari walikuwa nayo katika tambuzi zao kuhusu kifaru (mnyama). Tazama picha nyingine:



Picha 4: Aina za Ndege

Leksia *ndege* ilitumika katika lahaja ya Kiunguja (Burt, 1910). Mabadiliko yanatokana na kuingia kwa eropleni katika mazingira ya Afrika Mashariki baada ya kufika kwa Wakoloni. Mabadiliko haya yalitokea katika kipindi cha nusu ya kwanza, ya karne ya Ishirini. Kuwepo kwa ‘mbawa’ katika chombo hiki na uwezo wa kupaa angani kulichochea Waswahili kuhamisha maana kutoka wanda moja kwa lingine la kiutambuzi.

Uhusiano unaodhiihirika katika picha 1-4 ni wa kihistoria yaani dhana B ina asili katika A. Mkondo huu ndio uliozingatiwa katika mabadiliko ya kisemantiki ya leksia zifuatazo:

(2) Leksia	A		B
- lango	Kiingilio cha nyumba au mji	>	Mahali pa kufungia bao katika soka
Ulingo	Jukwaa la kulindia shamba	>	Jukwaa la michezo ~ wa masumbwi
Umeme	Mwanga uandamwao na radi	>	Nguvu za stima au betri
Kupe	Mdudu afyonzaye damu	>	Mtu mtegemezi
Tamba	Tembea, safari	>	Tembea kwa majisifu, simulia
(U)tatu	Mbili kuongeza moja	>	Shairi la mishororo mitatu katika beti

Maana za leksia katika B zina historia yake katika A. Basi kuwepo kwa umbo A ndio msingi wa kuwepo kwa umbo B.

(ii) Mabadiliko kupitia taswira ya mguso

Mabadiliko mengine hutegemea utambuzi kupitia hisia za mguso. Mathalani *msasa* ni aina ya mti wenyewe majani yenyewe mguso wa kukwaruza. Awali majani haya yalitumiwa na seremala kulainisha vitu vya mba (Krapf, 1882). Katika Kiswahili cha kisasa, msasa ni karatasi maalum iliyotiwa chembechembe za mchanga inayotumiwa na seremala ya mguso ya ukwaruzo' ndiyo imetumika kufanikisha badiliko hili. 'Kupiga mambo msasa' ni tamathali yenyewe maana ya kulainisha au kurekebisha mambo. Kadhalika kitenzi 'saga' kilikuwa na maana ya kuponaponda kitu hadi kiwe mfano wa ungaunga, sababisha kitu kiishe polepole kwa kukisugua na kingine (Krapf, 1882). Awali Waswahili walisaga nafaka kwa *mawe ya kusagia*. Jiwe kubwa la chini liliitwa *mama* na dogo la juu likiitwa *mwana* (Johnson, 1939). Katika mwisho wa karne ya ishirini, kitenzi – saga kilianza kutumika kama tasfida ya 'kitendo cha kufanya ngono kati ya wanawake wawili kwa kugusanisha uke wao ili kujifurahisha' (Longhorn, 2011). Msagaji basi ni mwanamke anayejamiiiana na mwanamke mwingine bila shaka kwa kugusisha sehemu za uke. Basi kuna mshabaha wa jinsi tendo la awali na tendo jipya hufanyika kupitia taswira ya mguso. Mbinu ya mabadiliko ya kisemantiki ni *upanuzi wa maana kisitiari, udhalilikaji na tasfida*.

Fauka ya hayo, kitenzi 'saga' kilikuwa na maana msingi ya *kuponaponda kitu hadi kiwe mfano wa ungaunga, sababisha kitu kiishe polepole kwa kukisugua na kingine* (Krapf, 1882). Awali Waswahili walisaga nafaka kwa *mawe ya kusagia*. Jiwe kubwa la chini liliitwa *mama* na dogo la juu likiitwa *mwana* (Johnson, 1939). Katika mwisho wa Karne ya Ishirini, kitenzi *saga* kilianza kutumika kama tasfida ya 'kitendo cha kufanya ngono kati ya wanawake wawili kwa kugusanisha uke wao ili kujifurahisha' (Longhorn, 2011). Basi msagaji ni mwanamke anayejamiiiana na mwanamke mwingine. Kuna mshabaha wa jinsi tendo la awali na tendo jipya

hufanyika kupitia taswira ya mguso. Mbinu za mabadiliko ya kisemantiki zilizokupitia mbinu ya upanuzi wa maana kisitiari, udhalilikaji na tasfida.

Maana ya awali ya ‘kereketa’ ni *patwa na mwasho kooni au kinywani kama ifanyavyo tumbako kwa pua au mdomo, au mchanga unapoingia kwa macho* (Steere, 1870; Krapf, 1882; Burt, 1910). Katika kisasa leksia hii imetwika maana za ziada yaani, *jambo la kuudhi, tetea jambo fulani kwa dhati baada ya kuchukua msimamo mkali*. Mabadiliko ya leksia yametiwa kasi na wanaharakati wa mashirika yasiyo ya kiserikali ya kutetea haki za wanajamii ambapo walipewa lakabu ‘wakereketwa’ na watetezi wa haki za binadamu. Uteuzi wa leksia hii huonesha misimamo sugu isiyotetereka. Leksia *kereketa* isikanganywe na *keketa*, ilioingia hivi majuzi katika Kiswahili, yenyе maana; *tafunu kitu, kuumwa na tumbo sana, kata kitu kigumu kwa kutumia kisu butu, tahiri mwanawake* (BAKITA, 2015). Maana inayoonekana kupewa kipaumbele katika kisasa hasa kwa wanaharakati wanaotetea haki za wanawake ni *tendo la kutahiri mwanawake*. Mabadiliko ya kisemantiki yanayohusika ni ya upigaji *chuku* na *sitiari*.

Maana ya awali ya ‘usugu’, kutokana na kitenzi ‘kusugua’ ni ugumu wa ngozi utokanao na msuguano baina ya viungo. Pia usugu hutokana na vidole kusuguana na viatu. Krapf (1882) anasema ‘sugu’ ni mahali pagumu. Katika kisasa leksia hii imepata maana za ziada: *tabia ya ukaidi, -sioweza kuondolewa kwa urahisi. -enyе kustahimili, -kutosikia adhabu au dawa, isiyobadilika kwa urahisi*. Msimamo ~, imani ~ ugonjwa ~. Hapa, maana ya leksia *imekuwa ya jumla*. Pia inatumiwa *kisitiari*.

(iii) Mabadiliko kupitia taswira ya mwonjo

Maana awali ya *mtindi* imekuwa ‘maziwa yaliyoganda na kupata ukali’ (Krapf, 1882). Pia ni maziwa yanayobaki baada ya kutolewa siagi. Katika kisasa leksia husika imebadilika kimaana na kupata maana ya ziada yaani *pombe*. Nahau *piga mtindi (kunywa pombe)*. Hapa leksia imehama kisitiari ambapo ‘maziwa’ huwakilisha ‘pombe.’ Mabadiliko hayo yalinua kutumia lugha ya kitasfida kuhepa hisia zisizofaa zinazohusishwa na pombe hasa ile haramu. Mbinu ya mabadiliko ya kisemantiki ni *sitiari* na *tasfida*. Aidha, maana ya awali ya *uroda* ilikuwa *-enyе raha, inayopendeza* (Massamba, 2004). Maana ya kisasa ya ‘uroda’ ni *tendo la kujamitana* (TUKI, 2013). Mbinu ya mabadiliko ya kisemantiki ni *tasfida* na *udhalilikaji wa maana*. Kadhalika keki ambayo ni mkate wenye sukari nyingi hutumiwa katika kisasa kama sitiari ya ‘rasilimali’ mathalani katika *kauli ~ ya taifa*.

(iv) Mabadiliko kupitia taswira ya kusikia

Maana ya msingi ya kitenzi *-endesha* ni kitendo cha kuongoza chombo cha usafiri kama gari, baiskeli na kadhalika kuelekea mahali fulani. Bila shaka mwendo wa vyombo vya usafiri huandamana na kelele fulani. Katika lugha ya hadhi kitenzi hiki hutumiwa kitasfida kuwakilisha dhana yenyе aibu ya ‘kuhara.’ Inaonekana tendo lenyewe limepigwa *chuku*. Muharo mwelesi hujulikana kama ‘parata’ (Nabhany, 2012). Mabadiliko haya yalihusu *upanuzi wa maana* kupitia *chuku, tasfida* na

udhalilikaji wa maana. Kadhalika, maana ya awali ya ‘foka’ ni *kitendo cha maji au pombe kuchemka na kutoa mapovu hadi kumwagika, maji kutoka kwa nguvu kupitia kwa tundu, bubujika*. Leksia hii imepata maana ya ziada katika kisasa yaani, *sema kwa harakaharaka na kwa hasira, sema kwa ukali*. Katika badiliko hili, tendo la kuteta linamithilishwa na tendo la kufoka kwa maji au pombe. Mbinu ya mabadiliko ya kisemantiki ni *upanuzi wa maana kisitiari* na *udhalilikaji*.

(v) **Mabadiliko kupitia taswira ya mnuso**

Kama tulivyotangulia kusema, maana za leksia huwa na muundo wa kiensaiklopidia. Basi leksia *choo* inapotajwa huchochaea (katika akili ya msikilizaji) maswala mengiyo yanayoambatana na dhana husika, kwa mfano, harufu chukizi itokanayo na kinyesi, kilindi/shimo au kijumba kilicho pembedi chenye nzi wengi, maji ya kuoga na kadhalika, kulingana na tajriba ya mhusika. Waswahili huona aibu kutaja maneno *mavi* na badala yake kutumia lugha ya kimafumbo. Maana msingi ya *choo* ni ‘chumba au mahala pa kujisaidia’ lakini ilibadilika na kupanuka kiupeo kupitia mkondo ufuatao:

Mahali/chumba pa kujisaidia > mavi > mambo ya upuzi, ya kijinga

Katika badiliko la kwanza, leksia *choo* imetumika kitasfida na kimetonimu ambapo dhana pana (chumba) inawakilisha dhana finyu (mavi). Matumizi ya *choo* kuwakilisha ‘mambo ya upuzi, ya kijinga au maovu’ ni ya kisitiari ambapo dhana ya mnuko ndiyo imetumiwa kudhalilisha maswala yanayorejerewa. Kuna leksia zingine zinazohusiana na dhana ya ‘choo’ ambazo zimebadilika kwa sababu ya tasfida. Maana ya awali ya *msalani (-ni* - kielezi cha mahali) ilikuwa ilikuwa *musalla*, lenye maana ya ‘mahali pa kusalia’ kisha ikasogea kwa ‘mkeka wa duara au zulia dogo la kuswalia’ na hatimaye ikaanza kutumiwa kama tasfida ya ‘chooni’ (Burt, 1910; Akidah, 2013). Katika Kiswahili cha karne ya 21, *msalani ni mahali pa usafi, chumba maalum ambapo watu huenda haja, chooni. Ameenda ~*. Leksia nyingine zinazoboresha dhana ya *choo* ni pamoja na *kwenda haja* na *kujisaidia*.

Uchanganuzi ulibainisha kuwa kuna leksia nyingine ambazo hubadilika kwa kuchochewa na maswala mengineyo yaliyo nje ya hisia tano za mwanadamu kwa mfano, *kipusa* (upembe wa kifaru) > *msichana mrembo*. Badiliko hili linatokana na ‘thamani’ iliyoambatanishwa kwa dhana hizi na si ‘urembo’ unaoonekana kwa macho halisi. Huu ni uwezo wa kiutambuzi.

Hitimisho

Makala haya yamebainisha wazi kuwa maarifa na tajriba zilizofichamwa kwenye utambuzi huwa nguzo muhimu katika kuleta mabadiliko ya maana za leksia. Imebainika wazi kuwa muundo wa maana na umbile la mwanadamu hasa hisia zake tano na ufasili wake wa ulimwengu wake husaidia mwanadamu kukabiliana na dhana mpya zinazoibuka katika mazingira halisi na ya kidhahania. Imebainika kuwa maana imefumwa katika historia, falsafa na tajriba za pamoja za wanajamii; ina sifa za kitamaduni. Utambuzi huwa ‘ghala’ la maarifa aliyonayo mtu (au jamii) ambayo kila kuchao huzidi kupanuka kiupeo, kufinyika na kugeuka kuambatana na maswala

yanayomzunguka. Kadhalika fasili tofauti za dhana moja, usisitizo na dhana kupewa kipaumbele ni maswala yachangiyo mabadiliko ya lugha. Mwisho, makala yameonyesha mchango na ufaafu wa vigezo vyatutambuzi vyatutambuzi ya nadharia ya Semantiki Tambuzi katika kuelezea mabadiliko ya lugha. Yamkini maana huwa sehemu ya utambuzi kwa jumla sawa na maswala mengine kama hisia.

Marejeleo

- Abdulaziz, M. H. (1979). *Muyaka 19th Century Swahili Popular Poetry*. Nairobi: Kenya Literature Bureau.
- Akidah, M. A. (2013). 'Phonological and Semantic Changes in Language Borrowing; The Case of Arabic words Borrowed Into Kiswahili' in *International Journal of Education and Research* Vol. 1, No. 4. University of Nairobi.
- Allen, J.W. T. (1971). *Tendi: Six Examples of a Swahili Classical Verse Form with Translations and Notes*. Nairobi: Heinemann.
- BAKITA (2015). *Kamusi Kuu ya Kiswahili*. Nairobi: Longhorn Publishers Limited.
- Burt, F. (1910). *Swahili Grammar and Vocabulary*. London. Society For Promoting Christian Knowledge. New York: Northumberland Avenue, W.C.
- Chiraghdin, S. (1987). *Malenga wa Karne Moja*. Nairobi: Longman Kenya limited.
- Croft, W. and Cruse, A. (2004). *Cognitive Linguistics*. Cambridge: Cambridge University Press.
- E.A.E.P. (2011). *Comprehensive Swahili – English Dictionary*. Nairobi: E.A.E.P. Limited.
- Fromkin, Rodman na Hyams (2011). *An Introduction to Language and Linguistics*, 9th edition. USA: Wadsworth Cengage learning.
- Geeraerts, D., ed. (2006). *Cognitive Linguistics: Basic Readings*. Berlin / New York: Mouton de Gruyter.
- Harris, L. (1962). *Swahili Poetry*. Oxford: The Clarendon Press.
- Hichens, W. (1939, 1972). *Al-Inkishafi: The Soul Awakening*. Nairobi: Oxford University Press.
- Johnson, F. (1939). *A Standard Swahili-English Dictionary*. Oxford: Oxford University Press.
- Kineene wa Mutiso (2005). *Utenzi wa Hamz̧iya*. Dar es Salaam: TUKI
- Kipacha, A. (2005). *Utangulizi wa Lugha na Isimu*. OSW 101. Dar es Salaam. Chuo Kikuu Huria cha Tanzania.
- Knappert, J. (1979). *Four Centuries of Swahili Verse*. London: Heinemann.
- Krapf, J. L. (1882). *Dictionary of Suaheli Language*. London: Trubner and Co. Ludgate Hill.
- Langacker, R. W. (2016). *Entrenchment in Cognitive Grammar*. Washington. De Gruyter Inc.
- Lakoff, G. & Mark, J. (1980). *Metaphor we Live by*. Chicago: Chicago University Press.
- Lee, D. (2001). *Cognitive Linguistics; An Introduction*. Oxford: Oxford University.
- Lemmens, M. (2017). 'Cognitive Semantics' in *Routledge Handbook of Semantics*. Editor Nick Riems. London and New York: Routledge.
- Longhorn Publishers (2011). *Kamusi ya Karne ya 21*. Nairobi: Longhorn Publishers.
- National Museums of Kenya (2005). Interactive Project: Swahili Attire Exhibition.
- Massamba, D.P. (Mhariri) 2004. *Kamusi ya Isimu na Falsafa ya Lugha*. Dar es Salaam: TUKI.

- Mulokozi, M. M. (Mhariri) 1999. *Tenzi Tatu za Kale*. Dar es Salaam: TUKE.
- Nabhany, S. A. (2012). *Kandi ya Kiswahili*. Dar es Salaam: Aera Kiswahili Researched Products.
- Päivi J. and Maria K. eds (2016). *The Lexical Typology of Semantic Shifts*. Washington: De Gruyter inc.
- Polome, E. (1967). *Swahili Language Handbook*. Washington. Centre for Applied Linguistics.
- Steere, E. (1870). *A Handbook of the Swahili Language as Spoken at Zanzibar. Revised Edition by Madan (1919)*, London: Society for Promotion of Christian Knowledge.
- Talmy, L. (2000). *Towards Cognitive Semantics; Vol. 1: Concept structuring Systems*. Cambridge: MIT Press.
- Timammy, R. na Swaleh, A. (2013). 'A Thematic Analysis of Utendi wa Kupona: A Swahili/Islamic perspective' in *Journal of Education and Practice*. Vol. 4. No 4.
- TUKE (2004, 2013). *Kamus ya Kiswahili Sanifu*. Nairobi: Oxford University Press.
- Vyvyan, E. and Greens, M. (2006). *Cognitive Linguistics. An Introduction*. Edinburgh: Edinburgh University Press.